



Broj: 01/1-50-1-1-64/09  
Sarajevo, 5.3.2009. godine

**Zabilješka sa sastanka sa Nj.E. ambasadorom Švicarske Konfederacije Rolfom Lencom, održanom u četvrtak 5.3.2009.**

Sastanku su prisustvovali: ambasador Švicarske Konfederacije Rolf Lenc, sa saradnicima, predsjedavajući Predstavničkog doma Parlamentarne skupštine BiH Beriz Belkić, predsjedavajući Ustavnopravne komisije Predstavničkog doma PSBiH Šefik Džaferović i sekretar Ustavnopravne komisije Predstavničkog doma PSBiH Igor Bajić.

Ambasador Lenc upoznao je predsjedavajućeg Doma Beriza Belkića i predsjedavajućeg Ustavnopravne komisije Šefika Džaferovića s namjerom Vlade Švicarske da pomogne u procesu ustavnih promjena realizacijom programa saradnje na nivou eksperata kao i organiziranjem radionica na kojima se bile razmatrane različite ideje i procesi za daljnje ustavne promjene koji bi se odvijale u institucijama BiH, u skladu s postojećim proceduralnim pravilima.

Belkić je ukazao na značaj i potrebu parlamentarne rasprave o procesu ustavnih promjena naglašavajući značaj medijacije međunarodne zajednice koja postoji i u sadašnjem procesu.

Ambasador Lenc pozdravio je započeti proces ustavnih promjena iz Pruda kao i otvorene diskusije lidera političkih stranaka smatrajući da pitanje unutrašnjeg uređenja Bosne i Hercegovine, odnosno teritorijalne rekonpozicije u sadašnjem trenutku nije trebalo pokretati, što je njegov lični stav, ističući da na ovo pitanje u sadašnjoj situaciji ljudi još uvijek reaguju jako emotivno. Dakle, prioritetno pitanje je funkcioniranje države, institucija i političkih procesa i mehanizama a pitanje teritorijalnog uređenja Bosne i Hercegovine treba rješavati kasnije.

Ambasador Lenc zatim je ukazao na osnovne karakteristike pomoći Vlade Švicarske kroz projekte koji se realiziraju s udruženjima općina i gradova s kojima su organizirane dvije javne rasprave o funkcionalnim procesima u lokalnim zajednicama te o odnosima i horizontalnom i vertikalnom povezivanju lokalnih zajednica.

Također, sličan projekat realizira se i sa savjetnicima političkih lidera, kao i s medijima s ciljem poboljšanja načina njihovog izvještavanja.

Sada postoji ponuda Vlade Švicarske da se sličan projekat realizira i u Parlamentarnoj skupštini BiH, što znači da ona nudi pomoć da, preko eksperata kao što je gospodin Nenad Stojanović, koji je porijeklom iz Bosne i Hercegovine a istovremeno je i poslanik kantona Ticino i naučni savjetnik švicarskog saveznog ministra za prirodnu okolinu, transport, energiju i komunikacije, organizira radionice na kojima bi bile razmatrane različite teme a koje bi

uključivale i ekspertizu sistema u federalno uređenim državama kao što je sistem Španije, Belgije ili Njemačke, dakle ne samo Švicarske.

Ukazano je da je švicarskoj vladi važno da ustavnopravne komisije i Parlamentarna skupština BiH ukažu na svoje potrebe i ponude i svoje prijedloge za ovaj projekat tako da okvir tema koje je ponudio profesor Stojanovića nije konačan.

Dakle, Vlada Švicarske - ambasada kao organizator nudi pomoć da putem radionica razvije procese rasprava i uključi i Parlamentarnu skupštinu BiH i ustavnopravne komisije u ovaj projekat.

Posebno je ponuđena pomoć u vezi sa usavršavanjem službenika iz Sektora za odnose s javnošću kako bi se procesi u Parlamentarnoj skupštini BiH adekvatno prezentirali javnosti.

Na kraju predsjedavajući Ustavnopravne komisije Predstavničkog doma PSBiH Šefik Džaferović istakao je da su teme koje su sada u fokusu za njega jako interesantne, posebno komparativni modeli organiziranja javnih rasprava.

Predsjedavajući Ustavnopravne komisije Predstavničkog doma PSBiH obavijestio je ambasadora Švicarske Konfederacije da će o ovom sastanku informirati članove Komisije koji će sigurno prihvatiti ovako interesantan projekat.

Dogovoreno je da novi sastanak u vezi s ovim projektom saradnici Ambasade Švicarske realiziraju u saradnji sa sekretarom Ustavnopravne komisije Predstavničkog doma Parlamentarne skupštine BiH.

SEKRETAR KOMISIJE  
**Igor Bajić**

**Dostaviti:**

- a/a

**Prilog:** Akt „Doprinos Švicarske u oblasti ustavne reforme“